

**UNDANG-UNDANG TUBUH KERJAAN NEGERI MELAKA  
BADAN PERUNDANGAN**

13. (1) Tertakluk kepada peruntukan Perkara ini, seseorang hilang kelayakan menjadi ahli Dewan Undangan Negeri jika-
- a) ia adalah dan telah didapati atau diisytiharkan tidak sempurna akal;
  - b) ia seorang bankrap yang belum dilepaskan;
  - c) ia memegang sesuatu jawatan berpendapatan;
  - d) Setelah dinamakan untuk dipilih menjadi ahli mana-mana satu Majlis Parlimen atau ahli Dewan Undangan Negeri, atau setelah bertugas sebagai ejen pilihan raya bagi seseorang yang dinamakan sedemikian, ia tidak menghantar apa-apa penyata perbelanjaan pilihan raya yang dikehendaki oleh undang-undang dalam masa dan mengikut cara yang dikehendaki;
  - e) Ia telah disabitkan suatu kesalahan oleh sesuatu mahkamah di Persekutuan dan dihukum penjara selama tempoh tidak kurang daripada satu tahun atau denda tidak kurang daripada RM2,000.00 dan ia tidak mendapat ampun bebas;
  - f) Ia kehilangan kelayakan di bawah mana-mana undang-undang berhubung dengan kesalahan berkenaan dengan pilihan raya bagi mana-mana satu majlis Parlimen atau bagi Dewan Undangan Negeri oleh kerana disabitkan suatu kesalahan itu atau telah dibuktikan dalam pembicaraan berhubung dengan suatu pilihan

raya itu sebagai bersalah atas suatu perbuatan yang menjadi kesalahan itu; atau

g) Ia telah dengan sukarela memperoleh kewarganegaraan mana-mana negeri di luar Persekutuan atau telah dengan sukarela menggunakan hak kewarganegaraan mana-mana negeri di luar Persekutuan atau telah membuat sesuatuakuan taat setia kepada mana-mana negeri luar Persekutuan.

(2) Kehilangan kelayakan seseorang di bawah perenggan (d) atau perenggan (e) Fasal (1) boleh dibatalkan oleh Yang di-Pertua Negeri dan juga sekiranya tidak dibatalkan sedemikian, kehilangan kelayakan itu hendaklah terhenti pada akhir tempoh lima tahun yang dikira mulai dari tarikh penyata yang tersebut dalam perenggan (d) itu dikehendaki diserahkan, atau, mengikut mana yang berkenaan, dari tarikh orang yang disabitkan sebagaimana tersebut dalam perenggan (e) itu telah dilepaskan daripada jagaan atau dari tarikh denda yang disebutkan dalam perenggan perenggan (e) tersebut dikenakan ke atas orang itu; dan seseorang tidaklah boleh dihilangkan kelayakannya di bawah perenggan (g) Fasal (1) semata-mata oleh sebab apa-apa jua yang dilakukan olehnya sebelum dia menjadi warganegara.

(3) Walau apa pun yang terkandung dalam peruntukan yang tersebut di atas dalam Perkara ini, di mana seseorang ahli Dewan Negeri menjadi hilang kelayakan dari terus menjadi ahli Dewan itu menurut perenggan (e) Fasal (1) atau di bawah mana-mana undang-undang yang disebutkan dalam perenggan (f) Fasal (1)-

a) Kehilangan kelayakan itu hendaklah berkuat kuasa apabila habisnya tempoh 14 hari dari tarikh dia –

i) Disabitkan dan dihukum sebagaimana dinyatakan dalam

perenggan (e) yang tersebut di atas; atau

ii) Disabitkan atas suatu kesalahan atau dibuktikan bersalah atas suatu perbuatan dibawah suatu undang-undang seperti yang disebut dalam perenggan (f) tersebut di atas ;  
atau

b) Jika dalam tempoh 14 hari yang dinyatakan dalam perenggan (a) suatu rayuan atau apa-apa prosiding mahkamah lain dibawa berkenaan dengan sabitan atau hukuman itu, atau berkenaan dengan kena disabitkan atau dibuktikan bersalah sedemikian itu, mengikut mana-mana yang berkenaan, kehilangan kelayakan itu hendaklah berkuatkuasa apabila habisnya tempoh 14 hari dari tarikh rayuan atau apa-apa prosiding mahkamah yang lain itu dilupuskan oleh mahkamah itu; atau

c) Jika dalam tempoh yang dinyatakan dalam perenggan (a) atau tempoh selepas pelupusan rayuan atau prosiding mahkamah yang lain yang dinyatakan dalam perenggan (b) itu ada difailkan suatu petisyen mendapat ampun, maka kehilangan kelayakan itu hendaklah berkuat kuasa sebaik sahaja petisyen itu dilupuskan.

4) Fasal (3) tidaklah terpakai bagi maksud penamaan atau pilihan raya mana-mana orang ke Dewan Undangan Negeri, dan bagi maksud tersebut kehilangan kelayakan itu hendaklah berkuat kuasa sebaik sahaja berlakunya kejadian yang disebut dalam perenggan (e) atau (f) Fasal (1), mengikut mana-mana yang berkenaan.

- 5) Seseorang yang meletakkan keahliannya dalam Dewan Undangan Negeri bagi negeri ini atau mana-mana negeri lain hendaklah, bagi tempoh 5 tahun bermula dari tarikh perletakan keahliannya berkuatkuasa, hilang kelayakkan untuk menjadi ahli Dewan Undangan Negeri bagi negeri ini.
  
14. Seseorang tidak boleh pada suatu masa menjadi ahli Dewan Undangan Negeri untuk mewakili lebih daripada satu bahagian pilihan raya.
  
15. (1) Jika seseorang ahli Dewan Undangan Negeri hilang kelayakan menjadi ahli dewan itu maka kosonglah kerusinya itu.  
  
(2) Jika seseorang yang hilang kelayakan menjadi ahli Dewan Undangan Negeri dipilih bagi Dewan itu, atau jika sesuatu pilihan raya adalah berlawanan dengan Perkara 14 maka pilihan raya itu adalah terbatal.  
  
(3) (dipotong oleh En. No. 7/1963)  
  
(4) Seseorang tidak boleh dinamakan dengan sahnya untuk dipilih menjadi ahli Dewan Undangan Negeri tanpa persetujuan orang itu.
  
16. Seseorang ahli Dewan Undangan Negeri boleh berhenti daripada menjadi ahli dengan mengutus surat yang ditandatangani olehnya kepada Speaker.
  
17. Jika seseorang ahli Dewan Undangan Negeri tidak hadir pada tiap-tiap persidangan Dewan itu selama tempoh 6 bulan tanpa kebenaran Dewan itu maka bolehlah Dewan itu mengisytiharkan kerusinya sebagai kosong.

- 18.(1) Jika berbangkit apa-apa soal sama ada seseorang ahli Dewan Undangan Negeri telah hilang kelayakan menjadi ahli maka soal itu hendaklah diputuskan oleh Dewan itu dan keputusannya itu adalah muktamad:

Dengan syarat bahawa Perkara ini hendaklah tidak dianggap sebagai menghalang amalan Dewan menengguhkan sesuatu keputusan untuk membenarkan penentuan apa-apa prosiding yang akan memberi kesan kepada keputusan itu (termasuk prosiding untuk menyingkirkan kehilangan kelayakan itu).

- (2) Jika seseorang ahli Dewan Undangan Negeri menjadi hilang kelayakan di bawah perenggan (e) Fasal (1) Perkara 13 atau di bawah mana-mana undang-undang yang disebut dalam perenggan (f) Fasal (1) Perkara 13, maka Fasal (1) yang tersebut tidaklah terpakai dan dia hendaklah terhenti menjadi ahli Dewan Undangan Negeri itu, dan kerusinya hendaklah menjadi kosong, sebaik sahaja kehilangan kelayakan berkuat kuasa mengikut Fasal (3) Perkara 13.
- 19.(1) Yang di-Pertua Negeri hendaklah memanggil Dewan Undangan Negeri bermesyuarat dari semasa ke semasa dan tidak boleh membiarkan jarak enam bulan antara persidangan yang akhir dalam satu penggal dengan tarikh yang ditetapkan untuk mesyuarat pertamanya dalam penggal yang kemudiannya.
- (2) Yang di-Pertua Negeri boleh memprorog atau membubarkan Dewan Undangan Negeri.
- (3) Melainkan jika dibubarkan terlebih dahulu, Dewan Undangan Negeri

hendaklah terus berjalan selama lima tahun dari tarikh mesyuarat pertamanya dan selepas itu adalah terbubar.

- (4) Apabila Dewan Undangan Negeri dibubarkan suatu pilihan raya umum hendaklah diadakan dalam tempoh 60 hari dari tarikh pembubaran itu dan Dewan Undangan Negeri baru itu hendaklah dipanggil bermesyuarat pada suatu tarikh yang tidak lewat daripada 120 hari dari tarikh pembubaran itu.
- (5) Sesuatu kekosongan luar jangka hendaklah diisi dalam tempoh 60 hari dari tarikh dipastikan oleh Suruhanjaya Pilihan Raya adanya kekosongan:

Dengan syarat bahawa jika kekosongan luar jangka itu dipastikan pada suatu tarikh dalam masa 2 tahun dari tarikh Dewan Undangan Negeri hendaklah, mengikut Fasal (3), menjadi bubar, maka kekosongan luar jangka itu tidak boleh diisi melainkan jika Speaker memberitahu Suruhanjaya Pilihan Raya secara bertulis bahawa kekuatan dari segi bilangan parti yang membentuk majoriti semua ahli Dewan Undangan itu terjejas oleh kekosongan itu, dan dalam keadaan itu kekosongan itu hendaklah diisi dalam masa 60 hari dari tarikh pemberitahuan itu diterima.